

Avatangiisit innarlitsaaliorneqarnissaanik pillugu Inatsisartut inatsisaat pillugu Nam-minersorlutik Oqartussat nalunaarutaat

Matumuuna Avatangiisit innarlitsaaliorneqarnissaanik pillugu Inatsisartut inatsisaat nr. 9, 22. november 2011-imeersoq, Inatsisartut inatsisaat nr. 1, 29. maj 2012-imeersoq, Inatsisartut inatsisaat nr. 10, 27. november 2018-imeersoq aamma Inatsisartut inatsisaat nr. 16 af 1. december 2021-imeersoq kingunerisaanik allannguutit ilanngullugit nalunaarutigineqarpoq.

Kapitali 1

Inatsisip siunertaa atuuffialu

§ 1. Inatsisartut inatsisaat nunap nunataani atuuppoq. Taamatuttaaq nunamit pisumit immami mingutsitsinermi inatsit atuuppoq.

§ 2. Inatsisartut inatsisaata pinngortitap avatangiisillu illersorneqarnissaat siunertaraa, taamaalilluni inuup inuuniarnikkut atugarisai aamma uumasunik naasunillu piuinnaarnissaat ataqqillugit piujuartitsinermik tunngaveqartinneqarluni inuiaqatigiit ineriartortinneqarlutik. Taamaalilluni inuiaqatigiit ineriartornerat piujuartitsinermik tunngaveqartinneqarluni inuup inuuniarnikkut atugarisai aamma uumasunik naasunillu piuinnaarnissaat ataqqillugit.

Imm. 2. Inatsisartut inatsisaatigut anguniarneqarpoq:

- 1) Silaannaap, erngup, sermip, qaqqat aamma nunap mingutsinneqartarnerisa pinaveersaartinneqarnissaat mingutsitsinerullu akiorneqartarnissaa.
- 2) Nipiliortitsinerup pinaveersaartinneqarnissaa akiorneqarnissaalu.
- 3) Innuttaasut peqqissuunissaannik illersuineq.
- 4) Mingutsitsinaveersaarnissap pilersaarusiorfigineqarnissaanut iliuuseqarfigineqarnissaanulli tunngavissiuinissaq.
- 5) Isumalluutitik atuinerup maangaannartitsisarnerullu killilersimaarneqarnissaa.
- 6) Eqqakkanik igitsisarnermut atatillugu atoqqiisarneq siuarsaavigalugu ajornartorsiutillu killilersimaarlugit.

Imm. 3. Inuup peqqinnartumik aamma peqqissinartumik inuunissaanut pingaaruteqartut aamma uumasut naasullu assigiinngiaartut piuinnaarnissaannut pingaaruteqartut avatangiisit pitsaasuujuarnissaasa immikkut qularnaarneqarnerannut Inatsisartut inatsisaat tunngavigineqassaaq.

§ 3. Inatsisartut inatsisaanni pineqarput:

- 1) Atortussianik issoqqasunik, imerpalasunik silaannartulluunniit pissusilinnik, imaluunniit uumassusilinnit pisunit aniatitsinikkut silaannarmik, imermik, serminik, qaqqanik aamma nunanik mingutsitsinermik kinguneqartitsisinnaasunik sulinerit suulluunniit.
 - 2) Sajuppilutsitsinerit, nipiliornerit aamma tipimit akorngutit.
 - 3) Tunisassiat nioqqutissialluunniit, suliarineqarnerminnut, uninngasuutineqarnerminnut, atorneqarnerminnut, assartorneqarnerminnut imaluunniit iginneqarnerminnut atatillugu mingutsitsinermik kinguneqartitsisinnaasut.
 - 4) Assartuutit aamma atortut nuuttakkat allat, mingutsitsinermik kinguneqartitsisinnaasut.
 - 5) Uumasuteqarneq aamma uumasut ajoqutaasut, peqqissutsimut avatangiisinullu ajornartorsiutaalersinnaasut imaluunniit avatangiisinut annertuumik akornutaalersinnaasut.
- Imm. 2.* Kiisalu sulineq sulianik navianartoqaratarsinnaasunik ilalik aamma atortussianik navianartulinnik toqqortaqlunilu assartuinerit Inatsisartut inatsisaat tunngasuvoq, taamaalilluni ingerlatsineri akornutit imaluunniit ajutoornerit, imm. 1-mi taaneqartuni mingutsitsinermik kinguneqarsinnaanerani navianartoqaratarsinnaanera pinaveersaartinneqarluni.

§ 4. Inatsisartut inatsisaannut silanut, kalaallit aatsitassarsiornermut inatsisaannut ilaatinneqartunut atatillugu avatangiisit innarlitsaaliorneqarneri ilaatinneqanngillat, taakkunungalugu maleruagassiineq, nakkutilliineq, upalungaarsimaneq akiuiniarnerlu ilanngullugit.

§ 5. Inatsisip atortinneqarnerani teknikkip atukkap pitsaanerpaap pissarsiarineqarsinnaasup atorneqarnissaa sapinngisamik pingaartinneqassaaq, tassunga ilanngullugit tunisassiassat annikinnermik mingutsitsisartut, suleriaatsit atortullu sanaartukkat aamma mingutsitsinermik akiuineri iliuuserineqarsinnaasut sapinngisamik pitsaanerpaat. Taamatut naliliineri teknikkikkut atortut minguinnerusut atorlugit pinaveersaartitsilluni suliaqarnissaaq immikkut pingaartinneqassaaq.

Imm. 2. Mingutsitsisoqarsinnaanerani pinaveersaartitsilluni aamma pinngitsoortitsiniarluni iliuuseqarnerup annertussusianik aamma sunaanissaanik naliliineri pingaartinneqassaaq:

- 1) Avatangiisit qanoq ittuineri aamma mingutsitsinerup taakkununga sunniutaatut ilimanartut aamma
- 2) Atortussiat atortullu piuneranni aqqusaartagaat tamaat, isumalluutini maangaannartitsisarnerup aamma siammarterisarnerup sapinngisamik annertunerpaamik killilerneqarnissaa siunertaralugu.

§ 6. Sulineq § 3-mi taaneqartutut ittoq ima inissinneqassaaq mingutsitsisinnaaneq tamatumalu sunniutigisinnaasaa sapinngisaq tamaat killilerneqarluni.

Imm. 2. Sumiiffissamik toqqaanermi sumiiffiup eqqaata qanoq issusia qajassuunneqassaaq, tassunga ilanngullugit naasut uumasullu, maannakkut aamma siunissami atuinissaaq, kiisalu avatangiisinut isumannaatsumik imermik minguttumik eqqakkanillu igitsisarnissamik periarfissat aamma ajutoornernik akiuinissaaq.

Imm. 3. § 3-mi taaneqartutut sulineri ingerlatsisoq aallarniiniartorluunniit mingutsitsinerup pinaveersaartinnaasut pinngitsoortinneqarnissaanullu pisariaqartunik iliuuseqassaaq aamma sulinerup ingerlanneqarnera ima aqqissuullugu, sulinerup mingutsitsinissaa sapinngisamik pinngitsoortinneqarluni.

Imm. 4. Sulinerit illutaasa aqqissuunneqarneranni ingerlatsinerullu aqqissorneqarnerani, tassunga ilanngullugit nioqqutissiornermi periaatsit, tunisassiassat aamma atortussiat iluaqusersuutit

toqqarneqarneranni qularnaarneqassaaq, isumalluutiniq atuineq, mingutsitsineq eqqagassaqalertarneralu sapinngisamik killilerneqarlutik.

Imm. 5. Kinaluunniit silaannarmik, imermik, sermimik, qaqqanik imaluunniit nunamik mingutsitsisoq imaluunniit taamatut mingutsitsisoqaratarsinnaaneraniq pilersitsimasooq, mingutsitsinerup kingunerata sunniutai sunniuteqarluartumik pinaveersaartinneqarnissaanik imaluunniit pinngitsoortinneqarnissaanik pisariaqartunik iliuuseqassaaq. Tamatuma saniatigut manna tikillugu pissusiusunik pilersitseqqinnissaaq isumaginiarneqassaaq.

§ 7. Pisortat oqartussat, sullissiviit, sulinerit kiisalu umiarsualiveqarfiit pisortat ingerlataannik sanaartornernik ingerlatsineranillu aamma pisiortortarnermi atuinermilu isumagisaqartut Inatsisartut inatsisaata siunertarisaata malinneqarnissaa immikkut peqataaffigissavaat.

Kapitali 2

Avatangiisit pillugit oqartussat

§ 8. Avatangiisit pillugit qitiusumik oqartussaaneq Naalakkersuisuniippoq.

§ 9. Sumiiffinni avatangiisit pillugit sumiiffinni oqartussaaneq kommunalbestyrelsimiippoq.

Kapitali 3

Qitiusumik avatangiisit pillugit oqartussat

§ 10. § 2-mi siunertap taaneqartup malinneqarnissaa siunertaralugu Naalakkersuisut maleruagassanik aalajangersaasinnaapput, tassunga ilanngullugit akiliutit aamma pissusiusimasunut pilersitseqqinnermut il.il. aningaasartuutitut akiliuteqartarneq aammalu aningaasartuutitut qularnaveeqqusiisarnissaaq pillugit, makkununga tunngasut:

- 1) Sulinermiit, sanaartukkaniit, maskiinaniit, atortuniit, kiassaateqarfinniit assartuutiniillu kiisalu taakkua aaqqissuunnerannit, ingerlanneqarneranni aserfallatsaalineqarneranniit igitsinermiillu mingutsitsinerit killilersimaarneqarnissaat.
- 2) Minguaaveqarfinniit, ikuallaavinniit, eqqaavissuarniit, eqqakkanik inissiivinniit assigisaanniillu aamma taakku aaqqissuunnerannit, ingerlanneqarneranni aserfallatsaalineqartarneranni aamma sanaartukkat taamaattut peerneqarneranni mingutsitsinerit killilersimaarneqarnissaat.
- 3) Ikummatissanut, kiassarnermut imaluunniit assartuutit maskiinallu ingerlanneqarnerannut atorneqartartut minguiissusissaat aamma atortussianut akugisassaat.
- 4) Naluffiusartuni, naluttarfinni uffartarfinnilu erngup pitsaassusia nakkutigineqarneralu.
- 5) Suliarininnerit navianartoqaratarsinnaasut kiisalu § 3, imm. 2-mi atortussiat navianartutut taaneqartut toqqortarineqarnerat assartorneqartarnerallu.
- 6) Imip, imap, sermip, qaqqat, silaannaap nunallu illersorneqarnissaat kiisalu nipiliornernut illersuinissamut.
- 7) Atortussiat aalajangersimasut aamma nioqqutissiat, atortussiat aamma nioqqutissiat aalajangersimasunik akuukkat, kiisalu atortut uummassusilinnit pisut, taakku innuttaasut peqqissusiannut imaluunniit avatangiisinut ajoqusiisnaappata, nunanit allanit eqqunneqarnissaasa, nunanut allanut

anninneqarnissaasa, nioqqutissiarineqarnissaasa, uninngasuutigineqarnissaasa, atorneqarnissaasa, assartorneqarnissaasa aamma tunineqarnissaasa inerteqqutigineqarnissaat imaluunniit killilerneqarnissaat kiisalu sunaassusersinissaat, nalunaaqutserneqarnissaat aamma peerneqarnissaat.

8) Nunat pissusianik, naasuinik allanillu ajoqusikkanik iluarsaassineq.

9) Uumasuteqarneq.

10) Uumasut ajoqutaasut.

11) Immigassat puui, tassunga ilanngullugit puussat aalajangersimasut atorneqarnissaannut inerteqqutit imaluunniit pisussaaffiit kiisalu utertitsisarnissamut aaqqissuussinermik pilersitsinissamut pisussaaffiit.

12) Inuinnaat aamma suliffeqarfiit paasissutissanik, inatsisip matuma allaffissornikkut ingerlanneqarneranut pingaaruteqartutut nalilerneqartunik, qitiusumik aamma sumiiffinni avatangiisit pillugit pisortatut oqartussanit noqqaaffigineqarneq tunngavigalugu tunniussinissamik pisussaaffiat.

13) Naatsorsuutunik piujuartitsinissamut attuumassutilinnik suliaqarneq tamanullu saqqummiussisarnissaq.

14) Avatangiisinut tunngasut pillugit nunat tamalaat akornanni isumaqatigiissutit aqputigalugit pisussaaffinnik naammassinnineq.

15) Anartarfiit imannik aamma eqqiluisaarnermit pisumit imermik minguttumik katersisarnermik piaasarnermillu aaqqissuussinerit, matumani ilanngullugit kommunalbestyrelsip malittarisassanik suliaqartarnera.

16) Eqqiluisaarnermi pissutsit.

17) Tupersimaartarfiit, kulturikkut, sunngiffimmi aamma timersornermik aaqqissuussinerit.

18) Sumiiffinni immani nunamilu uumasut pilanneqarnissaanik inerteqquteqartarneq imaluunniit pilaffissanik peqartitsineq.

19) Suliffeqarfiit, sanaartukkat aamma aaqqissuussani il.il. nammineq akilerlugu imminut nakkutiginnissannik pisussaaffik imalluunniit nammineq akilerlugu akuerisanit, pisinnaatitanit imaluunniit immikkut suliamik ilisimasalinnit assingusuni misissuisarfinnilu assingusuni imminut nakkutiginerup isumagitinnera.

20) Nakkutilliisutut oqartussat nakkutilliinerat, tassunga ilanngullugit avatangiisit pillugit nakkutilliinermut akiliuteqartarnermut maleruagassat.

21) Sanaartukkat, maskiinat, atortut assartuutillu suussusiinik akuersissuteqartarneq.

22) Imissatut pitsaassusilimmik pilersuiffup eqqaani ingerlatsineq, sanaartorneq aamma ilusilersuineq, tassunga ilanngullugu atortussanik toqqaaneq.

23) Eqqakkanik perusersarfinnillu eqqaanermik aaqqissuussinerit.

24) Toqusut inaat, toqusunik ikuallaasarfiit aamma iliveqarfiit.

25) Napparsimmaviit eqqagassaannik igitsisarneq.

26) Pissutsit inuit tamat eqqiluisaarnerannut peqqissusiannullu pingaarutillit.

27) Assartuutit atorlugit angallannerup aaqqiissuteqarfigineqarnera, tassunga ilanngullugu kommunalbestyrelsip asimi assartuinermit aqputigineqartussanik aamma ingerlaffissanik aalajangersaasinnaatitaanissaa.

28) Nioqqutissiat isumannaatsuunissaat.

Imm 2. Umiarsuit kasiilkkat passunnissaat pillugit Naalakkersuisut maleruagassanik aalajangersaasinnaapput, tassunga ilanngullugit umiarsuit ingutserlugit aggornissaannut atoqqiinissamullu atuuttussanik pisussaaffit pillugit.

Imm. 3. Naalakkersuisut makkua pillugit maleruagassanik aalajangersaasinnaapput:

- 1) Sanaartukkani aalajangersimasuni mingutserisartuni inuit aqutsisut taakkununga teknikkikkut pisariaqartunik ilisimasaqarnissaat tamatumunngalu uppersaateqartarnissaat.
- 2) Sulisorisat, sanaartukkani aalajangersimasuni mingutserisartuni suliaqartartut, sanaartukkanik avatangiisinut tunngatillugu isumannaatsumik ingerlatsinissamut uppersaateqartassasut, tassunga ilanngullugu ilinniartitsissutissat imarisassaat uppersaatillu pissarsiarineqarnissaannut piumasaqaatinik naammassinnissimanissaq.
- 3) Suliffeqarfiit mingutsitsinerusut qanoq iliorlutik sulisorisaminnik avatangiisit pillugit sulinermut akuutsitsisarnissaat.

Imm. 4. Sanaartukkani innuttaasut peqqissusianut aamma avatangiisinut immikkut pingaarutilinni inuit aqutsisut taakkununga pisariaqartumik teknikkikkut ilisimasaqarnissaat aamma tamanna pillugu uppersaateqartarnissaat pillugit Naalakkersuisut maleruagassanik aalajangersaasinnaapput.

§ 11. § 10 naapertorlugu kommunalbestyrelsip maleruagassanik erseqqinnerusunik maleruagassaliornissaanut Naalakkersuisut aalajangersaasinnaapput.

§ 12. Inatsisip atuuffiata iluani Naalakkersuisut ilitsersuusiorsinnaapput, tassunga ilanngullugit silaannaap, erngup issup, nipiliornerup, eqqakkat, tipip il.il. pitsaassusissaanut piumasaqaatit.

§ 13. Pissutsinut, Inatsisartut inatsisaannit matumanga malittarisassiuunneqartunut pingaarutilinnik iliuusissanik aallartitseqqullugit kommunalbestyrelsi isumaqatiginiareerlugu Naalakkersuisut kommunalbestyrelsimut peqqusisinnaapput.

§ 14. Inatsisartut inatsisaata matuma aqunneqarneranut pisortat aningaasartuutaasa matussutissaanik akiliuteqartarnissaq pillugu Naalakkersuisut maleruagassanik aalajangersaasinnaapput.

Kapitali 4

Imap imillu illersorneqarnerat

§ 15. Imerpalasut atortussiallu imarmik aamma imermik mingutsitsisinnaasut kuummut, tatsinut imaluunniit imaanut kuutsinneqassanngillat, kisiannili ima toqqorsivimmiitsinneqassallutik kuummi, tatsini imarmilu imermik mingutsitsinnaaneq sapinngisamik annertupaamik killilerneqarluni.

Imm. 2. Atortussiat kinnganeri immamiittut aamma imermiittut imermik mingutsitsillugit sunnerneqassanngillat.

§ 16. § 15, imm. 1-mi aamma 2-mi aalajangersagaqarualartoq aniatitsilluni kuutsitsinissamut Naalakkersuisut akuersissuteqarsinnaapput taamaaliornermilu piumasaqaatinik aalajangersaallutik, tak, imm. 2.

Imm. 2. § 15, imm. 1-mi aalajangersagaqarualartoq kommunalbestyrelsi, illunit aalajangersimasumik amerlassusilinnit minguaaveqarfiit inuinnarnit pigineqartut aqqutigalugit kiisalu sullivinnit aalajangersimasumik angissusilinnit, suliffeqarfiit mingutsitsinerusut allattorsimaffiani ilaanngitsut, tak. § 19, imm. 2, kangerlummuk aamma immamut aniatitsilluni kuutsitsinissamut akuersissuteqarsinnaavoq.

Imm. 3. § 15, imm. 1-mi aalajangersagaqaraluartoq, aniatitsilluni kuutsitsinissamut akuersissuteqarsinnaavoq aamma taakkununga tunngasunik errorfinnit imikoorummik nunamut aamma kussinernut ammasunut kangerlummuk imaluunniit immamut kuuttunut aniatitsilluni kuutsitsinissamut piumasaqaatinik aalajangersaasinnaavoq.

Imm 4. Imm. 1 – 3 malillugu aalajangiisoqannginnerani Nunatsinni Nakorsaaneqarfik tusarniaaffigineqassaaq.

§ 17. Imermik minguttumik minguiaaveqarfik avatangiisinut tunngatillugu isumannaatsumik ingerlanngippat, avatangiisinut oqartussat § 16, imm. 1 – 3 naapertorlugu akuersissuteqarnermi atugassarititatut piumasaqaatit aalajangersakkat allanngortissinnaavaat imaluunniit peqqusisinnaapput sanaartugaq pisariaqartumik pitsanngorsarneqassasoq imaluunniit nutarterisoqassasoq:

- 1) § 16, imm. 1 – 3 malillugu piumasaqaatit aalajangersarneqartut minguiaaveqarfimmiit eqqortinneqanngippata imaluunniit isumagineqanngippata.
- 2) Mingutsitsinerup ajortumik avatangiisinut sunniutai pillugit paasissutissanik nutaanik pingaarutilinnik pissarsisoqarpat.
- 3) Akuersissutip tunniunneqarnerani ilimaginngisamik mingutsitsineq avatangiisinut annertuumik ajoqusiinermik nassataqarpat.
- 4) Mingutsitsineq akuersissutip tunniunneqarnerani tunngavigineqartumit annertuumik annertuneruppat.

Imm. 2. Mingutsitsineq unitsinneqarsinnaanngippat, sanaartukkap ingerlanneqarnerata ingerlaannarnissaata inerteqqutigineqarnera oqartussat nalunaarutigisinnaavaat.

Imm. 3. Mingutsitsinerup nassataanik peqqissuunissaq annertuumik aamma navianartorsiortinneqarpat inerteqquteqartoqarneq ingerlaannartumik sunniuteqartussangorlugu erniinnaartumik nalunaarutigineqarsinnaavoq.

§ 18. Naalakkersuisut maleruagassanik aalajangersaasinnaapput, taakkununga aningaasartuutininik makkuninnga akiliuteqartoqarnissaa ilanngullugu:

- 1) Erngup minguttup sermimut, nunaannarmut, immamut aamma imermut aniatinneqarluni kuutsinneqarneranut.
- 2) Erngup minguttup salinneqarnissaanut aamma aniatillugu kuutsinneqarneranut.
- 3) § 16, imm. 1 - 3 naapertorlugit suliaassat suliarineqarnerat.
- 4) Sanaartukkat pioreersut siunissamilu sanaartugassat minguiaaveqarfinnut atassusernerat.
- 5) Imeq minguttoq pillugu kommunimut pilersaarummik suliaqarnissamik kommunalbestyrelsip pisussaaffia.
- 6) Kommunimi imeq minguttoq pillugu pilersaarutit akuerineqarnerat.
- 7) Engup minguttup aniatinneqarnissaa pillugu akiliisoqartarnissaanik aaqqissuussinermik kommunalbestyrelsip maleruagassanik suliaqarsinnanera.

Kapitali 5

Suliffeqarfiit mingutsitsinerusut

§ 19. Suliffeqarfiit, sanaartukkat imaluunniit aaqqissuussinerit mingutsitsinerusut, imm. 2-mi taaneqartumi allattuiffimmi allattorneqarlutik ilaatinneqartut sananeqaratilluunniit sananerat aallartinneqassanngillat tamatumunnga akuersissut tunniunneqartinnagu.

Imm. 2. Suliffeqarfiit, sanaartukkat imaluunniit aaqqissuussinerit mingutsitsinerusut imm. 1-mi akuersissummik peqarnissamut pisussaaffeqarlutik ilaasut pillugit Naalakkersuisut allattuiffiliussapput.

Imm. 3. Suliffeqarfiit, sanaartukkat, imaluunniit aaqqissuussinerit imm. 1-2-mi taaneqartut mingutsitsinerup annertusineranik nassataqartumik illutaat allineqassanngillat imaluunniit allanngortinneqassanngillat ingerlatsinerulluunniit annertusineqaranilu allanngortinneqassanngilaq, allineqarnissaannut allanngortinneqarnissaanulluunniit akuersissummik peqartinnani. Annertusitsineq allanguinerilluunniit annertunerusumik mingutsitsinermik nassataqassanersoq Naalakkersuisut aalajangissavaat.

Imm. 4. Sanaartukkat suliffeqarfillu pioreersut ingerlatiinnarnissaannut akuersissummik tunineqarnissaq pisariaqanngilaq. Suliffeqarfiit, sanaartukkat imaluunniit aaqqissuussinerit pioreersut imm. 2-mi taaneqartumi allattuiffimmi ilaatinneqartut, piffissap aalajangersimasup iluani allilernerqaratillu allanngortinneqassanngikkaluarunilluunniit, akuerineqarnissaminnut qinnuteqartassaapput.

§ 20. Naalakkersuisut peqqusisinnaapput, mingutsitsinermik misissuinissaq immikkut pisariaqarsorineqarpat sulliviit aalajangersimasut, sanaartukkat imaluunniit aaqqissuussinerit, taakku § 19, imm. 2-mi taaneqartumi allattuiffimmi ilaappata ilaanngikkaluarpataluunniit, piffissaq aalajangersimasoq qaangiutsinnagu akuersissummik qinnuteqassasut, tak. § 19, imm. 1.

§ 21. Akuersissummi piumasaqaatit unioqqutinneqarpata, suliffeqarfik, sanaartugaq imaluunniit aaqqissuussineq, Naalakkersuisut isumaat malillugu annertuumik mingutsitsilluni, ikiuutaasussatut iliutsinik aallartitsisoqarnissaanik Naalakkersuisut peqqusisinnaapput.

§ 22. Mingutsitsineq ikiorserneqarsinnaanngippat, imaluunniit § 21 malillugu peqqussutaasoq unioqqutinneqarsimappat, ingerlatsinerup ingerlatiinnarnissaanut Naalakkersuisut inerteqquteqarsinnaapput aamma suliffeqarfiup, sanaartukkap imaluunniit aaqqissuussap unitsinneqarnissaa imaluunniit peerneqarnissaa piumasarisinnaallugu.

§ 23. Mingutsitsineq avatangiisinut imaluunniit peqqinnissamut navianartorsiortitsinermik annertuumik kinguneqassappat, suliffeqarfiup, sanaartukkap imaluunniit aaqqissuussap ingerlaannarnissaanut kommunalbestyrelsi erniinnaartumik inerteqquteqarnissaq nalunaarutigisinnaavaa. Tamatuma malitsigisaanik kommunalbestyrelsi tamanna pillugu Naalakkersuisunut erniinnaartumik ilisimatitsissaaq.

Imm. 2. Imm. 1 malillugu kommunalbestyrelsi inerteqquteqarluni nalunaaruteqarnerata kingorna kingusinnerpaamik Naalakkersuisunit ullut 14-it iluini aalajangiineq ataannassanersoq pillugu pineqartut nalunaarfigineqanngippata, inerteqquteqarneq atorunnaassaaq.

§ 24. Akuersissutip tunniunneqarneraniit ukiut arfineq pingasut qaangiutereersimappata, tamanna avatangiisitigut tunngavissaqarpat, imaluunniit saliinissamut periutsinik pitsaanerusunik ineriartortitsisoqarsimappat imaluunniit nioqqutissiornermi periaatsinik annikinnerusumik mingutsitsinik ineriartortitsisoqarsimappat, nutaamik akuersissuteqarnikkut piumasaqaatit

Naalakkersuisut allanngortissinnaavaat.

Imm. 2. Imm. 1-mi pineqartoq piffissaliussaq immikkut suliaqarfinnut sivikinnerussasoq Naalakkersuisut maleruagassanik aalajangersaasinnaapput, taamaattorli ukiunik sisamanik sivikinnerunngitsumik.

§ 25. Piffissami avatangiisinik atuinermik akuersissutip atuuffiani §§ 21–23 naapertorlugit taamaallaat peqqusisoqarsinnaavoq imaluunniit inerteqquteqartoqarsinnaavoq ima pisoqarsimappat:

- 1) Akuersissummi piumasaqaatit unioqqutinneqarlutik.
- 2) Mingutsitsinerup ajortumik sunniuteqarsinnaanera pillugu paasissutissat pingaaruteqartut nutaat saqqummersimallutik.
- 3) Akuersissutip nalunaarutigineqarnerani sillimaffigineqareersinnaangitsunik mingutsitsineq avatangiisinut ajoquseerujussuartunik kinguneqarsimappat, imaluunniit
- 4) Akuersissummi tunngavigineqartut annertuumik qaangerlugit mingutsitsisoqarpat.

§ 26. Suliffeqarfimmit mingutsitsinerusumiit kapitali 4 malillugu kuunnut, tatsinut imaluunniit immamut toqqaannartumik imermik minguttumik aniatitsinissamut akuersissut kapitali manna naapertorlugu akuersissutit aalangiiffigineri peqatigalugit suliarineqassaaq ataatsimullu akuersissuteqarnermut ilaatinneqassalluni. Avatangiisinik atuinermik akuersissutip ilaa imermik minguttumik aniatitsinermut tunngasoq § 24, imm. 1-mi pineqartumi ukiuni arfineq pingasunut imaluunniit § 24, imm. 2-mi pineqartumi piffissaliussamut sivikillissamut ilaanngilaq.

§ 27. Naalakkersuisut suliffeqarfinnut mingutsitsinerusunut atasumik avatangiisinik atuinermik akuersissutit pillugit maleruagassanik aalajangersaasinnaapput, tassunga ilanngullugit:

- 1) Qinnuteqarnermi aamma akuersissuteqarnermi aqqissuussinerup ilusia imarisaalu.
- 2) Nalunaaruteqartartussaataaneq.
- 3) Akuersissummut atasumik piumasaqaateqarneq.
- 4) Akuersissutitut piffissamik killiliineq.
- 5) Matusineq kingornatigullu suliarinninneq.
- 6) Qularnaveeqqusiineq.
- 7) Piumasaqaatinik unioqqutitsineq.
- 8) Inerteqquteqarneq peqqusinerlu.
- 9) Imminut nakkutigineq aamma avatangiisinik misissuineq.
- 10) Suliat taakku suliarineqarnerinut atatillugu oqartussat aningaasartuutaannik matusissutissanik akiliuteqartitsisarneq.

Kapitali 6

Imissaq

§ 28. Illoqarfinni nunaqarfinnilu imermik pilersuinermut atorneqartut imissamik pissarsiffigineqarsinnaasut eqqaanni assikkanik Naalakkersuisut aalajangersaassapput.

Imm. 2. Imm. 1-mi taaneqartut assikkat iluanni:

- 1) Qamutit motoorillit assartuutit atorneqaqqusaanngillat.
- 2) Atortut/sakkut motoorillit atorneqaqqusaanngillat.

- 3) Illunik, aqqusinernik aamma pisuinnartunut aqqustissianik pilersitsisoqassanngilaq.
- 4) Illut pioreersut allineqassanngillat.
- 5) Inuussutissarsiornikkut suliffeqarfinnik, sullissivinnik assigisaanillu ingerlatsisoqassanngilaq.
- 6) Uumasuuteqaqqusaanngilaq.
- 7) Atortussianik imermik mingutsitsisinnaasunik atuisaqassanngilaq, assartuisoqassanngilaq imaluunniit uninngasuuteqassanngilaq.
- 8) Suliat nr. 1-7-mut taaneqanngikkaluartut imermik mingutsitseratarsinnaasut ingerlassassanngillat.

Imm. 3. Imermik pilersuiveqarfik § 31 malillugu imissap pitsaassusissaanut Naalakkersuisut piumasaqaatigisaanut eqqortitsinermik qulakkeerinnissinnaasumik imermik suliarinniffeqarpat imm. 2-mi sulianik taaneqartunik arlaannik ataatsimik arlalinnilluunniit akuersisunik Naalakkersuisut maleruagassaliorsinnaapput.

Imm. 4. Killiliussat imm. 2-mi taaneqartut annaassiniarnermi politiillu ujarlerneranni assigisaannilu atasumik angallassinermi atuutinngillat.

§ 29. Inuiaqatigiinni pissutsit pingaarutillit pisariaqartippassuk Naalakkersuisutqaqutiguinnaq § 28, imm. 2-mi inerteqquteqarnermiit immikkut akuersissuteqarsinnaapput.

Imm. 2. Imm. 1-mi immikkut akuersissutit qaquguluunniit Naalakkersuisunit taarsiissutitaqanngitsumik allanngortinneqarsinnaapput imaluunniit atorunnaarsinneqarsinnaapput, Naalakkersuisut naliliinerat naapertorlugu imissaqarfiit mingutsinneqarnissamut navianartorsiorpata.

§ 30. Naalakkersuisut kommunalbestyrelsimut tusarniaareerlutik imissamik imaluunniit siunissami imissamik pissarsiffigineqarsinnaasunik assinikkut mingutsitsinissamik navianartoqarnera pinaveersaarumallugu inerteqquteqarlutilluunniit peqqussisinnaapput.

Imm. 2. Siunissami imissamik pissarsiffigineqarsinnaasuni aalisartoqassanngitsoq, angallattoqassanngitsoq, illuliortoqassanngitsoq, aqquserngiortoqassanngitsoq, ingerlaffissanik illiniliortoqassanngitsoq, uninngaartoqassanngitsoq il.il. pillugit Naalakkersuisut piumasaqaatinik aalajangersaasinnaapput.

§ 31. Erngup imissatut siunertanulluunniit allanut atorneqartup, imissatullu pitsaassuseqartinneqartussap, piumasaqaatit minnerpaaffissaat Naalakkersuisunit aalajangersarneqartut naammassissavai.

Imm. 2. Imissatut pitsaassusilimmik imissatut siunertanulluunniit allanut atorneqartussamik imermik taratsumillu katersuineq Naalakkersuisunit akuersissutigineqassaaq.

§ 32. Imissatut pitsaassusilimmik imermik illoqarfinni nunaqarfinnilu pilersuiffiup atulersinnissaa sioqqullugu imermut aamma imermik suliarinninnermut atassuteqartut aamma imip pitsaassusaanut iluaqutaasumik ajortumillu sunniuteqarsinnaasut Naalakkersuisunit akuerineqassapput.

Imm. 2. Imermik pilersuiveqarfiit akuerisat allanngortinneqassanngillat Naalakkersuisut akuersissuteqaqqaartinnagit.

Imm. 3. Atortut imermik aqqusaarneqartartut annertuut ataatsimut taarserneqarnissaat akuereqqaarneqassanersoq Naalakkersuisut aalajangissavaat.

§ 33. Kapitali manna naapertorlugu suliani tamani Naalakkersuisut kommunalbestyrelsimut, Nakorsaaneqarfimmut aamma Kalaallit Nunaanni Nersutit Nakorsaqaarnermi Inuussutissalerinermilu oqartussaasunut tusarniaareerlutik aalajangiisassapput.

§ 34. § 2-mi taaneqartup siunertap isumagineqarnissaa siunertaralugu Naalakkersuisut maleruagassanik aalajangersaasinnaapput, tassunga ilanngullugu siornatigut pissutsinut pilersitseqqinnermut il.il. aningaasartuutunik akiliuteqartarnissaaq aamma aningaasartuutitut qularnaveeqquisiarnissaaq, makkununga tunngasunik:

- 1) Imissatut allanullu atugassamik imermik imarmillu katersineq aamma maannakkut imeqarfiit siunissamilu imeqarfissat qularnaarneqarneri.
- 2) Erngup imissap aamma inuussutissanik suliffissuaqaarnermi nioqqutissiornermi imermik imissatut pitsaassusilimmik suliat ingerlannerinut atorineqartussap katersorneqartup pitsaassusia aamma nakkutiginera.

Kapitali 7

Eqqakkat

§ 35. Kialuunniit eqqagassanik pilersitsisup, uninngatitsisup, assartuisup, passussaqartup igitsisartulluunniit peqqinnissamut tunngassuteqartunik jornartorsiulersitsinnginnissaaq imaluunniit silaannarmik, imermik, serminik, qaqqamik aamma nunamik mingutsitsinnginnissaaq akisussaaffigaa.

Imm. 2. Eqqakkat taaguutaat pillugit Naalakkersuisut maleruagassanik aalajangersaassapput.

Imm. 3. Kialuunniit eqqagassanik pilersitsisup, katersuisartup, suliarinnittartup, ikuallaasartup allatulluunniit eqqagassanik, puukkunik imaluunniit atortut sinnikuinik igitsisartup, Naalakkersuisut noqqaassuteqarnerisigut eqqakkat allaffissornikkut aqunneqarnerannut paasissutissat pingaarutillit suugaluartunilluunniit nalunaarutigisassavai.

§ 36. Kommunalbestyrelsip eqqakkanik igitsisarnissaaq isumagisaraa, atortussiallu imaluunniit tigussaasup suulluunniit eqqagassatut naliliiffigineqartarnissaa aalajangiiffigissallugu. Biilnik, umiatsiaanik, umiarsuarnik, qamuteralannik aamma tigussaasunik sunilluunniit angisuunik assigisaanillu peersinissaaq aatsaat pisinnaavoq, taakkua sivikinnerpaamik qaammatini pingasuni inuttassarsiuunneqareeraangata.

Imm. 2. Kommunalbestyrelsiimm. 1-imi aalajangiineq taaneqartoq aalajangiiffigineqareerpat eqqakkatut isigineqartunik passussinermi igitsinermilu aningaasartuutit atussutissaqartinniarlugit tamakku tuniniarsinnaavai akitsorterussillunuunniit.

Imm. 3. Kommunalbestyrelsi eqqakkanut aaqqissuussinerup annertussusia, aaqqissugaanera allallu pillugit najoqqutassatigut maleruagassanik aalajangersagaliussaaq. Malittarisassat Naalakkersuisunit akuerineqassapput.

Imm. 4. Pinaveersaartinissaaq aamma eqqakkat isumannaatsumik uninngasuutigineqarnissaat, passunneqarnissaat iginneqartarnissaaq qulakkeernissaat siunertaralugu kommunalbestyrelsi peqqusisinnaavoq imaluunniit inerteqquteqarsinnaavoq.

Imm. 5. Kommunalbestyrelsi eqqakkat pillugit pilersaarusiussaaq nalunaarsuillunilu, kommunip eqqakkat pillugit pilersaarutaani eqikkarneqartussanik. Kommunip eqqakkat pillugit pilersaarutaa Naalakkersuisut

pingaarnerusutigut eqqakkat pillugit iliuusissatut pilersaarutaannut tamanut atuuttumut aamma maleruagassanut allanut Naalakkersuisunit aalajangersarneqartunut, tak. § 45, imm. 2-4, kiisalu nunaminertat atorineqarnerat pilersaarusiernerlu pillugit Inatsisartut peqqussutaannut naapertuutissaaq.

§ 37. Atortussiat, nioqqutissiat atortullu, silaannarmik, imermik, sermimik qaqqanik aamma nunamik mingutsitsisinnaasut:

- 1) Nunamut sermimulluunniit matoorunneqassanngillat.
- 2) Nunamut, qaqqamut sermimulluunniit aniatinneqassanngillat uninngasuutigineqaratillu.
- 3) Nunap iluanut kuutsinneqassanngillat.

§ 38. Kalaallit Nunaannut eqqagassanik eqqusinissaq inerteqqutaavoq, taamaattorli imm. 2 takuuk.

Imm. 2. Eqqagassat pineqartut annertussusaannut suussusaannullu passussinissamut Kalaallit Nunaanni naammattunik periarfissaqartoq Naalakkersuisut naliliippata, Naalakkersuisut eqqakkanik eqqussinissamut akuersissuteqarsinnaapput. Inissiinissaq siunertaralugu eqqussinissamut akuersissummik tunniussisoqarsinnaanngilaq taamatullu eqqagassanik navianartunik eqqussinissamut akuersissummik tunniussisoqarsinnaanani.

Imm. 3. Nunanut, nunat killeqarfii akimorlugit, eqqakkanik navianartunik assartuisarnermi taakkualu iginneqartarnerisa nakkutigineqarnerat pillugit Basel-imi isumaqatigiissummut ilaasunut eqqakkanik nunanut allanut taamaallaat aallarussisoqarsinnaavoq.

Imm. 4. Nuna eqqussivissaq imaluunniit nunat akunniffissat eqqakkanik tiguserusunnginnissaat tunngavissalimmik iligimagineqarpat, Naalakkersuisut eqqakkanik avammut nassiussinissamut inerteqquteqarsinnaapput.

Imm. 5. Naalakkersuisut eqqakkanik eqqussisarnermut avammullu nassiussinissamut inerteqquteqarsinnaapput.

§ 39. Makkununga aningaasartuutitut matussutissatut akiliutissanik kommunalbestyrelsi aalajangersaasinnaavoq:

- 1) Eqqakkat pillugit aaqqissuussinerit pilersaarusiorneqarnerannut, pilersinneqarnerannut, ingerlanneqarnerannut, piiarneqarneranut, suliareqqiinerlut aamma allaffissornikkut ingerlanneqarnerannut, tassunga ilanngullugit innuttaasunut innersuussinissamut aaqqissuussinerit aamma ilitersuinerit.
- 2) Eqqakkanik allanillu immikkoortiterineq, katersuineq assartuinerlu.
- 3) Eqqakkanik atoqqitassanik, eqqakkanik ikualagassanik eqqakkanillu igitassanik suliarinninnermut suliffeqarfiit sanaartukkallu pilersinneqarnerat ingerlanneqarnerallu.
- 4) Paasissutissanik katersuineq nalunaarsuinerlu.

Imm. 2. Imm. 1 naapertorlugu akiliutit illuutillit, suliffeqarfiit, sullissiviit umiarsualiviulluunniit, nunaminertani atugassanngortinneqartuniittut imaluunniit nunaminertani atorineqartussanngortinneqartuniittut, eqqakkat pilerfianniittut pisussaaffittut isumagisassaraat.

§ 40. Naalakkersuisut makkua pillugit maleruagassanik aalajangersaassinnaapput:

- 1) Eqqagassat pillugit maleruagassanut aalajangersakkat ilusilersorneqarnerat.
- 2) Katersuinissanut innersuussisarnissamullu aaqqissuussinerit.

- 3) Eqqakkat iginneqarfissaannut periarfissanik innersuussinissamut kommunalbestyrelsip pisussaaffia.
- 4) Eqqakkat katersorneqartarnissaannut iginneqartarnissaannullu kommunalbestyrelsip isumaginninnissaanut pisussaaffii, tassunga ilanngullugu atortut nioqqutissiallu atoqqinneqartarnissaat.
- 5) Innuttaasut, illuutillit, suliffeqarfiit, sullissiviit umiarsualivinnilu oqartussat katersuisarnermik aaqqissuussinerit igitsivissatullu periarfissat innersuunneqartut imaluunniit asimi, illoqarfinni nunaqarfinnilu eqqaanissamut aaqqissuussinerit atorneqarnissaannut pisussaaffii.
- 6) Innuttaasut, illuutillit, suliffeqarfiit, sullissiviit umiarsualivinnilu oqartussat eqqakkat pillugit nalunaaruteqartarnissamut paasissutissiisarnissamullu kiisalu eqqakkat misissuiffiqineqartarnissaannut pillugit pisussaaffii, tassunga ilanngullugit Naalakkersuisut kommunillu maleruagqusaanni allassimasutut nalunaaruteqartarnissat.
- 7) Asimi aamma illoqarfinni nunaqarfinnilu atortussianik, nioqqutissianik aamma atortunik igitaqarnissamut inerteqqutit.

Imm. 2. Eqqakkanik passussineq pillugu Naalakkersuisut maleruagassanik aalajangersaasinnaapput, tassunga ilanngullugit:

- 1) Eqqakkat immikkoortunut suussusersinerat, nalunaarutigineqarnerat, immikkoortiterneqarnerat, pilerfii aallaavigalugit immikkoortiterneqarnerat, uninngasuutigineqarnerat, katersorneqarnerat, assartorneqarnerat, passunneqarnerat suliarineqarnerallu.
- 2) Eqqagassaqaatigiiaat aamma eqqakkat suussuseqaatigiikkuutaat.
- 3) Suliffeqarfiit aamma umiarsualiviit eqqagassaqaatigiiaanik aamma eqqakkanik suussuseqaatigiikkuutaanik aalajangersimasunik immikkoortiterisartut aamma suliarinnittut.
- 4) Aningaasartuutit akilernissaat aamma aningaasartuutitut qularnaveequsiinerit aamma suliffeqarfiit umiarsualivinnilu oqartussat namminnek akilerlugu avatangiisinut pitsaassutsinullu aqutsinermik aaqqissuussinernik pilersitsinissaanut pisussaaffeqarnerat.

Imm. 3. Eqqakkat ajornartorsiutigineqarnerisa killilerneqarnissaat imaluunniit atoqqiisarnerup siuarsarneqarnissaa siunertaralugu Naalakkersuisut makku pillugit maleruagassanik aalajangersaasinnaapput:

- 1) Suliareqqitassat immikkut ittut, atortussiat akuutissat imaluunniit iluaqutigineqartartut eqquteqqusaannginnissaat imaluunniit killilimmik nunanit allanit eqqunneqarsinnaasarnissaat.
- 2) Suliareqqitassat immikkut ittut, atortussiat akuutissat imaluunniit iluaqutigineqartartut atortuni nioqqutissianiluunniit, Kalaallit Nunaanni sananeqartuni atorneqartuniluunniit, ilanngunneqartannginnissaat aalajangersimasumilluunniit annertussusilerlugit atorneqarsinnaasarnissaat.
- 3) Nioqqutissianik tunisassianilluunniit aalajangersimasunut siunertalimmik atorneqartussanik nunanit allanit eqqussuinerit imaluunniit nioqqutissiornerit, tassunga ilanngullugit poortuutissiat, Naalakkersuisunit akuersissutigineqassapput.
- 4) Nioqqutissianik tunisassianilluunniit aalajangersimasunut siunertalimmik atorneqartussanik nunanit allanit eqqussuinerit imaluunniit nioqqutissiornerit, tassunga ilanngullugit poortuutissiat, aalajangersimalluinnartumik nalunaaqutserneqartassapput, kiisalu allatut nalunaaqutsiineq killililersimaarneqassaaq imaluunniit inerteqqutigineqassalluni.

§ 40 a. Naalakkersuisut nukissiuutit, akuutissat atortussalluunniit sulianit pisut, Inatsisartut inatsisaanni aalajangersakkanut allanut ilaangitsut atorlugit mingutsitsinissap pinaveersaartinnissaanut pinngitsoortinnissaanullu maleruagassanik aalajangersaasinnaapput, peqqussuteqarsinnaapput imaluunniit inerteqquteqarsinnaapput, kiisalu piumasaqaateqarsinnaallutik, suliat taakku inatsimmut allamut ilaangippata.

Kapitali 8

Sanaartugassanik anginerusunik sanaartornissamut akuersissuteqarnermut atatillugu avatangiisinut sunniutinik naliliineq

§ 41. Kinaluunniit annertuumik sanaartorniarluni imaluunniit suliffeqarfimmik pilersitsiniarluni pilersaaruteqartoq, annertuumik avatangiisinut sunnuteqartussatut isumaqarfigineqartumik, tamatumunga Naalakkersuisut akuerseqqaartinnagit aallartitsissanngilaq.

Imm 2. Imm. 1 naapertorlugu akuersissummik qinnuteqartoqarneranut atatillugu pilersaarutip avatangiisinut sunniutai pillugit nassuiaat Naalakkersuisunut nassiunneqassaaq.

§ 42. Naalakkersuisut makku pillugit maleruagassanik aalajangersaasinnaapput:

- 1) Suliffeqarfiit, sanaartukkat aamma aaqqissuussinerit suut kapitali 8-mut ilaatinneqassasut.
- 2) Qinnuteqarnermi aamma akuersissuteqarnermi aaqqissuussinerup ilusia imarisaalu pillugit piumasaqaatit.
- 3) Avatangiisinut sunniutat naliliiffigineqarnerat pillugu nalunaarutip imarisassaanut piumasaqaatit.
- 4) Nalunaaruteqartartussaataaneq.
- 5) Akuersissuteqarnermut atasumik piumasaqaatit.
- 6) Matusineq kingornatigullu suliarinninneq.
- 7) Qularnaveeqqusiineq.
- 8) Piumasaqaateqarneq.
- 9) Inerteqquteqarneq peqqusinerlu.
- 10) Imminut nakkutigineq aamma avatangiisinik misissuineq.
- 11) Suliat taakku suliarineqarnerinut atatillugu oqartussat aningaasartuutaannik matusissutissanut akiliut.

Kapitali 9

Nalunaarsuineq pilersaarusiorterlu

§ 43. Naalakkersuisut kommunit erseqqinnerusumik isumaqatiginiareerlutik pissutsinik, kommunini avatangiisinik innarlitsaaliuinnermut pingaaruteqartunik nalunaarsuineq pilersaarusiorterlu pillugit maleruagassanik aalajangersaasinnaapput.

§ 44. Mingutsitsinerup tamarmiusup killilersimaarnissaa siunertaralugu inuussutissarsiortermi immikkoortunut imaluunniit pisortat pilersuinerannut aalajangersimasunut Naalakkersuisut iliuusissanut pilersaarusiortinnaapput.

Imm. 2. Naalakkersuisut kommunalbestyrelsinut, pisortat pilersuinerannut aalajangersimasunut peqqusisinnaapput inuussutissarsiornermi suliat erseqqinnerusumik taaneqartut pillugit iliuusissanut pilersaarusoqqullugit.

Imm. 3. Iliuusissanut pilersaarutit nioqqutissiat, atortussiat imaluunniit atortut erseqqinnerusumik aalajangersimasut atorneqartarnerat, aniatinneqartarnerat imaluunniit iginneqartarnerat annikkillisiniaarlugit anguniagassatut aalajangersakkanik, kiisalu avatangiisinut sunniutaasut nalunaarsorneqarnissaannut suliffeqarfiit, pisortat pilersuinermik sulliviutaat imaluunniit inuussutissarsiornermi immikkoortut ataasiakkaat pisussaaffeqarnerannik kiisalu tamanna pillugu paasissutissanik tunniussinissamut piumasaqaatinik imaqaarsinnaavoq.

Imm. 4. Iliuusissanut pilersaarusionsi imm. 2-mi taaneqartuni anguniakkat kiisalu imarisaa annertussusialu kommunalbestyrelsit, pisortat pilersuinermik sulliviutaat imaluunniit inuussutissarsiornermi suliatigut suliniaqatigiiffiit isumaqatiginiareerlugit aalajangersarneqassapput.

§ 45. Naalakkersuisut pingaarnertigut eqqakkat pillugit iliuusissamik pilersaarusiussapput. Pilersaarut ukiut sisamakkaarlugit suliarineqartassaaq, ukiuni aqqaneq-marlunni tulliuttuni eqqagassanik passussinermut tunngasoq.

Imm. 2. Kommunit eqqakkat pillugit iliuusissanut pilersaarutaasa imaa, suliaqarnermullu tunngatillugu kiisalu pilersaarutit nutartertarnissaannut piffissanik killiliinernik aamma suleriaatsinik Naalakkersuisut maleruagassanik aalajangersaasassapput.

Imm. 3. Eqqakkat pillugit pilersaarusionsiormut piumasaqaatit suut tunngavigineqarnissaat pillugit Naalakkersuisut maleruagassanik aalajangersaassapput.

Imm. 4. Eqqakkat nalunaarsornissaannut aamma eqqagassat pillugu pilersaarusionsiormut ilaasumik paasissutissat suut kommuninit katersorneqarlutik Naalakkersuisunut nassiussaneraat pillugu Naalakkersuisut maleruagassanik aalajangersaassapput.

§ 46. Naalakkersuisut ukiumoortumik avatangiisit pillugit nalunaarummik suliaqartassapput.

Kapitali 10

Pigisanut il.il. isersinnaaneq

§ 47. Inatsit naapertorlugu pisortat imaluunniit inuit taamatut piginnaatinneqartut, eqqartuussiviup aalajangigaanik peqanngikkaluarlutik, pissusissamisoortumik kinaassutsimut uppersaammik peqarlutik, pigisamut aamma silami nunaminertanut il.il. atuisinnaatitaasutut piginnittup atugaanut isersinnaapput, Inatsisartut inatsisaat manna naapertorlugu pisinnaatitaanertik isumaginiarlugu. Isersinnaaneq sioqqullugu atuisinnaatitaasutut piginnittoq sapinngisamik nalunaarfigineqaqqaassaaq.

Imm. 2. Eqqartuussiviup aalajangigaanik peqarnani imm. 1 naapertorlugu iserneq aatsaat pissaaq ilimanarpat imaluunniit natsorsuutigineqarpat annertuumik peqqissutsimut ulorianartorsiortitsisoqartoq aamma annertuumik mingutsitsineq imaluunniit mingutsitsinerup siaruarnera pinngitsoortiniarlugu ingerlaannartumik iliuuseqartoqartariaqartoq.

Imm. 3. Imm. 1-mi isersinnaatitaanerup atorneqarnerani politiit pisariaqartutigit ikiutissapput.

Kapitali 11

§ 48. Inatsisartut inatsisaat malillugu akuersissutit, akuersissutinik tunniussinissaq allanilluunniit aalajangiinissaq nalunaaruteqarnissarlunniit sioqqullugu Naalakkersuisut innuttaasunik attaveqaqateqartarnermut, tamanut ammasumik saqqummiussisarnermut tamanillu akuutitsisarnermut maleruagassanik sukumiinerusunik aalajangersaasinnaapput. Aamma Naalakkersuisut Inatsisartut inatsisaanni suliassa qarfinnut tunngatillugu pilersaarusiordermi tamanik akuutitsinissamut maleruagassanik aalajangersaasinnaapput.

Imm. 2. Naalakkersuisut *imm. 1* naapertorlugu innuttaasunik attaveqaqateqarnermi kiisalu tamanut ammasumik saqqummiussinermi aammalu tamanik akuutitsinermi taamaallaat atortut digitaliusut atornerqarnissaannut maleruagassanik aalajangersaasinnaapput.

Kapitali 12

Pisortat oqartussat nakkutilliinerat

§ 49. Kommunalbestyrelsip nalinginnaasumik nakkutigissavaa:

- 1) Inatsisip aamma taanna tunngavigalugu maleruagassat aalajangersarneqartut eqqortinneqarnissaat.
- 2) Peqqusinermik imaluunniit inerteqquteqarnermik aalajangikkat malinneqarnissaat, aamma
- 3) Piumasaqaatit akuersissuteqarnermut atasumik aalajangersarneqartut eqqortinneqarnissaat.

Imm. 2. § 32-mi imermik pilersuiveqarfiit taaneqartut aamma suliffeqarfiit, § 19. *imm. 2*-mi pineqartumi allattuiffimmi ilaatinneqartut, aamma kapitali 8-mi suliat taaneqartut Naalakkersuisut nakkutigissavaat.

Imm. 3. Imermik minguttumik pisortanit pigineqartunit tamanit atornerqartunit aamma suliffeqarfinnit § 19, *imm. 2*-mi pineqartumi allattuiffimmi ilaatinneqartunit imermik minguttumik aniatitsinerit Naalakkersuisut nakkutigissavaat.

Imm. 4. Kommunalbestyrelsimik isumaqatiginninniareerlutik Naalakkersuisut suliffeqarfinnik immikkut ittunik nakkutilliineq kommunalbestyrelsinut isumagissanngortissinnaavaat. Nakkutilliineri suliaasat, Inatsisartut inatsisaat manna malillugu imaluunniit inatsisip matuma kingunerisaanik maleruagassaliat malillugit kommunalbestyrelsimit isumagineqartussat, kommunalbestyrelsimik isumaqatiginninniareernikkut, Naalakkersuisunut isumagissanngortinneqassanersut Naalakkersuisunit maleruagassalioneqarsinnaavoq.

Imm. 5. Kommunalbestyrelsi pissutsinut *imm. 2-3* malillugu Naalakkersuisut nakkutilliinerannut pingaaruteqartunik paasisaqaruni tamanna Naalakkersuisunut nalunaarutigissavaat. Annertuumik mingutsitsineq taassumaluunniit suli annertunerusumik siaruarnissaa pinngitsoortinniarlugu piaarnerpaamik akuliuttoqarnissaa pisariaqartinneqarpat peqqussutigineqartussat inerteqqutigineqartussalluunniit pisariaqartut kommunalbestyrelsip Naalakkersuisut sinnerlugit ingerlaannarluni nalunaarutigissavai, taamaaliorninilu tamatuma kingorna Naalakkersuisunut ilisimatitsissutigalugu.

Imm. 6. Kingusinnerpaamik ullut 14-it qaangiutsinnagit, *imm. 5* malillugu kommunalbestyrelsip inerteqquteqarluni imaluunniit peqqusilluni nalunaaruteqarneranit pineqartut aalajangiineq ataannassanersoq Naalakkersuisunit nalunaarfigineqanngippata, inerteqquteqarneq imaluunniit peqqusineq atorunnaassaaq.

§ 50. Nakkutilliisutut oqartussat pissutsinik unioqqutitsisoqarneranik paasisaqarunik, taamaattut unitsinneqarnissaat isumagissavaat. Tamatumunnga tunngatillugu inerteqqutit peqqussutilluunniit pisariaqartut pinaveersaartitsinerit imaluunniit pissutsinik pilersitseqqinnissamik iliuuseqarnissat nakkutilliisutut oqartussat nalunaarutigissavaat.

Imm. 2. Suliffeqarfiit aamma innuttaasut suliaat, peqqinnissamut imaluunniit avatangiisinut pissutsinut ajornartorsiortitsilernermik kinguneqartitsisut, mingutsitsineq annikilliseqqullugu imaluunniit aalajangersimasunik iliuuseqaqqullugit, nakkutilliisutut oqartussanit peqquneqarsinnaapput.

Imm. 3. Sulianut mingutsitsinermik imaluunniit peqqissutsimik akornuseeratarsinnaasutut annertuumik navianartutut nalilerneqartunut nakkutilliisutut oqartussat eqqusisinnaapput.

Akornusiisoqaratartoqarsinnaanera pinngitsoorneqarsinnaangippat, suliffeqarfimmut imaluunniit suliarineqartoq pillugu inerteqqussummik nakkutilliisutut oqartussat nalunaaruteqarsinnaapput.

§ 51. Inatsit manna naapertorlugu peqqussineq imaluunniit inerteqqut nalunaarutigineqartoq piffissaliussap iluani malinneqanngippat, oqartussat peqqussisut imaluunniit inerteqquteqartut akisussaasumut akiligassanngorlugu iliuusereqqusaq isumagitissavaat.

Imm. 2. Annertuumik mingutsitsineq pinngitsoortinniarlugu imaluunniit taassuma siaruarnissaa pinngitsoortinniarlugu piaarnerpaamik qanoq iliuuseqarnissaaq pisariaqarpat, pisortat nakkutilliisut peqqussuteqaqqaaratik iliuusissat pisariaqartut isumagissavaat akisussaasumut akiligassanngorlugu.

§ 52. Kinaluunniit Inatsisartut inatsisaanni matumani pineqartumi suliffeqarfimmik ingerlataqartoq noqqaaffigineqarnikkut:

- 1) Mingutsitsisoqaratarsinnaaneranut imaluunniit illersuutissatut qanoq iliuuserineqartussat naliliiffiginissaannut pingaaruteqartunik pisortatut nakkutilliisunut paasissutissiissaaq.
- 2) Pisortatut nakkutilliisut taakkulu sinniisui sullivimmi sanaartukkanut tamanut isersinnaatitsissaaq kinaassutsimik ilisarnaatip pissusissamisoortup takutininneratigut.
- 3) Atortunik il.il. pineqartup atugaanik misiligummik tunniussaqaassaaq, kiisalu atortussianik igitassanik peqarpat.
- 4) Pisortatut nakkutilliisunut kinaanermik ilisimatitsissaaq.

§ 53. Suliaqarnermi mingutsitsisoqarneranik pissutaasinnaasunut akisussaasoq, ingerlatsinermi akornuteqartoqarpat imaluunniit ajutoorneq annertuumik mingutsitsinermik kinguneqarpat imaluunniit taamaattoqarsinnaanera navianartoqarpat, erngerluni pisortatut nakkutilliisunut nalunaaruteqassaaq. Nalunaaruteqartussaataaneq taanna Inatsisartut inatsisaat imaluunniit taanna tunngavigalugu maleruagassiat aalajangersarneqartut uniorlugit mingutsitsinermik kinguneqarpat imaluunniit tamatumunnga ulorianartorsiortitsippat atuutissaaq.

Imm. 2. Nunaminertami mingutsitsisoqartoq paasineqarpat, nunaminertamik atugassinneqarsimaaq imaluunniit atuisinnaatitaasoq erngerluni nakkutilliinermut oqartussaasunut nalunaaruteqassaaq.

Imm. 3. Suliaqarnermi mingutsitsisoqarnermik pissutaasinnaasunut akisussaasoq, mingutsitsinerup annertusinnissaa pinngitsoortinniarlugu imaluunniit mingutsitsisoqarnissaanik navianartorsiorneq pitsaaliorlugu, annertuumik mingutsitsisoqarsinnaaneramik navianartoqartillugu atortussianik il.il. mingutsitsisunik aniatitsineq erngerluni unitsissavaa.

§ 54. Kinaluunniit suliffeqarfimmik, pigisamik nalilimmik pigisalik imaluunniit ingerlataqartoq, imaluunniit pisortat suliffiutaat, pisortat nakkutilliisut noqqaassuteqarnerat naapertorlugu mingutsitsisoqaratarsinnaanera imaluunniit mingutsitsineq pillugu naliliinermut pingaaruteqartunik kiisalu pinaveersaartitsiniarluni imaluunniit ikiorsiissutitut iliuuserineqartut pillugit paasissutissanik tunniussissaaq.

Imm. 2. Kinaluunniit suliffeqarfimmik, pigisamik nalilimmik siusinnerusukkut pigisaqarsimasoq imaluunniit ingerlataqarsimasoq, imaluunniit pisortat suliffiutaat, pisortat nakkutilliisut noqqaassuteqarnerat naapertorlugu mingutsitsinerup killeqartinnissaanut imaluunniit mingutsitsisoqaratarsinnaanerup pinngitsoortinnissaanut pingaaruteqartunik paasissutissanik tunniussissaaq.

Imm. 3. Piginnittoq ingerlatsisorluunniit akisussaasoq pisortanit nakkutilliisunit peqquneqarsinnaavoq, imm. 1 naapertorlugu., nammineq akiligassaanik makkuninnga suliaqaqqullugu:

- 1) Atortussianik avatangiisinut aniatinneqartartunik, nipiliortitsinermik kiisalu sajuppilutsitsinermik misiligutissanik tiguseqqullugu, misissueqqissaaqqullugu uuttortaaqqullugu. Misissuinermit inernerit kinguarsaanertaqanngitsumik nalunaarutigineqassasut nakkutilliisutut oqartussat piumasarisinnaavaat.
- 2) Atortussianik nioqutissianillu atorneqartunik suliareneqartunilluunniit kiisalu atortussianik eqqagassanik misiligutissanik tiguseqqullugu aamma misissueqqissaaqqullugu. Misissuinermit inernerit kinguarsaanertaqanngitsumik nalunaarutigineqassasut nakkutilliisutut oqartussat piumasarisinnaavaat.
- 3) Mingutsitsinerup pisup pinerata sumik pissuteqarneranik aamma sunniutaanik nassuiaaneq.
- 4) Mingutsitsinerup kingunerisassaasa qanoq ikiorserneqarnissaat imaluunniit pinaveersaartinneqarnissaat qulaajarlugu.

§ 54 a. Inuk imaluunniit suliffeqarfik nakkutilliinermut oqartussaasunut ilisimatitsinissamik kissaateqanngippat, suliap Kalaallit Nunaannut eqqartuussisarneq pillugu inatsit naapertorlugu misissuinerup ingerlaqqinnissaanut atugassatut Kalaallit Nunaanni Politiinut tunniunneqannginnerani pineqartup akiligaanik nakkutilliinermut oqartussaasut pisariaqartinneqartunik misissuisinnaapput, Inatsisartut inatsisaat imaluunniit taanna tunngavigalugu maleruagassiarineqartut unioqqutinneqarsimanersut misissuiffigalugu.

§ 54 b. Inatsisartut inatsisaanni matumani maleruagassat naapertorlugit nakkutilliinermi akulerunnermiluunniit nakkutilliinermut oqartussaasut uppersaatisaanik assiliisinnaapput, assileeqqissinnaapput tiguisinnaallutilluunniit imaluunniit pigisanik allanik tiguisinnaallutik. Allagaatit pigisallu tiguneqarsimanerinit atsiorneq tunniunneqassaaq. Allagaatit pigisallu misissueqqissaarnermut atorneqartussaannngitsut misissuinermit kingusinnerpaamik ulluinnaat 14-it qaangiutsinnagit suliffeqarfimmut utertinneqassapput.

§ 55. Kommunalbestyrelsi noqqaaffigineqarneq naapertorlugu kommunip pineqartup iluani avatangiisit pillugit pissutsit naliliiffiginissaanut pingaaruteqartunik Naalakkersuisunut sunik tamanik paasissutissiissaaq.

§ 56. Pisortat nakkutilliisut sulinerisa ingerlanneqarnera aamma annertussusia pillugu Naalakkersuisut maleruagassanik aalajangersaasinnaapput.

Imm.2. Kommunalbestyrelsit nalunaarsuineramik nakkutilliinermilu ingerlatsinerat pillugu nalunaarutini nassiussisarnissaat pillugu Naalakkersuisut maleruagassanik aalajangersaasinnaapput, tassunga ilanngullugit uuttortaanermi misissuinermilu inernerit, kiisalu nalunaaruteqartarnerit ilusaat pillugit maleruagassanik aalajangersaasinnaallutik.

Imm.3. Kommunalbestyrelsip ilanngutitinneratigut piffissamut aalajangersimasumut tunngatillugu kommunalbestyrelsip nakkutilliinermi pisussaaffiata annertussusia pillugu Naalakkersuisut aalajangersaasinnaapput.

Kapitali 13

Peqqussuteqarnermut inerteqquteqarnermullu tunngatillugu najoqqutassat

§ 57. Suliamut attuumassuteqartut tusarniaaffigereerlugit pisortat peqqussuteqarnermik imaluunniit inerteqquteqarnermik aalajangiinerat allaganngorlugu pineqartunut nalunaarutigineqassaaq Nunatsinni Nakorsaaneqarfik ilisimatillugu. Aalajangiinerit imarissavaat aalajangiinerup malinneqarnissaanut piffissaliussaq.

§ 58. Peqqinnissamut navianartorsiortitsineqalersillugu kiisalu annertuumik mingutsitsineq imaluunniit mingutsitsinerup siaruaannissaa pinngitsoortinniarlugu ingerlaannartumik akuliunnissaq pisariaqalersillugu, peqqusinermik inerteqquteqarnermilluunniit aalajangerneq oqaasiinnakkut nalunaarutigineqarsinnaavoq ingerlaannartumillu malinneqassalluni.

§ 59. Nakkutilliinermi suliaassani tamani, peqqinnissamut navianartorsiortitsisoqarneranik imaluunniit tamatumunnga navianartorsiortitsisoqaratarsinnaaneramik pinngitsoortitsinissamik tunngaveqartumik peqqussinissami imaluunniit inerteqquteqarnissami Nunatsinni Nakorsaaneqarfik aalajangiinermi peqataatinneqartassaaq.

Kapitali 13 a

Aalajangersakkat allat

§ 59 a. Avatangiisit eqqarsaatigineqarnerini imaluunniit nunani tamalaani isumaqatigiissutit malinniarneqarnerini pisariaqartinneqarpat, Inatsisartut inatsisaat manna imaluunniit avatangiisinik innarlitsaaliuineranut maleruagassaasimasut naapertorlugit akuersissutitut tunniunneqartut, akuersissutit aamma immikkut ittumik akuersissutit allannngortinneqarsinnaapput utertinneqarsinnaallutilluunniit. Allannguineq utertitsinerluunniit sapinngisamik tamatumunnga piffissaliussamik naammaginarumik malitseqartinneqartassaaq.

Imm. 2. Imm. 1 akuersissutinut, kapitali 5-imut ilaatinneqartunut atuutinngilaq.

Kapitali 14

Maalaaruteqarneq aamma eqqartuussivimmi suliaannngortitsineq

§ 60. Inatsisartut inatsisaat manna imaluunniit inatsimmik matumunnga toqqammaveqarluni maleruagassat aalajangersarneqartut naapertorlugit aalajangiinerit tamarmik Avatangiisit

Innarlitsaaliorneqarnissaat pillugit Naammagittaalliuuteqartarfimmut suliaassanngortinneqarsinnaapput.

Imm. 2. Maalaaruteqarsinnaasut tassaapput:

- 1) Aalajangiiffigineqartut.
- 2) Nunatsinni Nakorsaaneqarfik.
- 3) Kinaluunniit suliap qanoq naammassineqarnissaanut nammineq immikkut annertuumillu soqutigisaqartoq.
- 4) Peqatigiiffiit suleqatigiiffillu, malittarisassatik naapertorlugit nunanik peqqissarfullutik qasuersaarfiusartunik, avatangiisinik pinngortitamillu annertuumik soqutigisanik isumagisaqarnissamik siunertaqartut.

Imm. 3. Maalaaruteqarnissamut piffissaliussaq sapaatit akunneri arfniliupput, piffissat uku kingulliit aallaavigalugit naatsorsorlugit:

- a) Aalajangiinnermut sammitinneqartup ullormiit aalajangiinerup nalunaarutiginerannit.
- b) Akuersissutip ullormi tamanut saqqummiunneqarneraniit, tamanut saqqummiussinissamut pisussaaffik Inatsisartut inatsisaat manna malippagu imaluunniit inatsit manna malillugu maleruagssatigut aalajangersarneqarsimappat.

Imm. 4. Naammagittaalliuuteqartarfiup aalajangigai pisortat ingerlatsiviinut allanut suliaassanngortinneqarsinnaanngillat.

§ 61. Avatangiisit Innarlitsaaliorneqarnissaat pillugit Naammagittaalliuuteqartarfik pingasunik ilaasortaqrpoq. Inatsisartut inassuteqareernerisigut siulittaasussamik aamma ilaasortanik marlunnik, taakkunannga aappaa Kalaallit Nunaanni kommunit ataatsimoorlutik inassuteqarnerisigut, Naalakkersuisut toqqaassapput. Ilaasortanut tamanut ilaasortanik toqqaasarnertut periaaseqarluni sinniisussanik toqqaasoqassaaq.

Imm. 2. Naammagittaalliuuteqartarfimmiilaasortat Naalakkersuisunut ilaasortaassanngillat.

Imm. 3. Naammagittaalliuuteqartarfimmi piffissap qinigaaffiup Inatsisartunut qinigaaffik piffissaq assigaa. Ataatsimiititaliaq nutaamik Inatsisartunut qinikkat katersuunneranni siulittaasussamik inassuteqareernissaata tungaanut sulissaaq.

Imm. 4. Naammagittaalliuuteqartarfimmut ataatsimeeqataasartunik sulianik immikkut ilisimasalinnik aggersaasoqarsinnaavoq.

Imm. 5. Naammagittaalliuuteqartarfiup suleriaasissani nammineq aalajangersassavaa.

§ 62. Maalaaruteqarnek peqqussinnermut imaluunniit inerteqqussummut kinguartitsisarpoq Avatangiisit Innarlitsaaliorneqarnissaat pillugit Naammagittaalliuuteqartarfiup suliami aalajangiinissaata tungaanut imaluunniit Naammagittaalliuuteqartarfiup allatut aalajangiinissaata tungaanut.

Imm. 2. Pisortat, pissutsinik immikkut ittunik pisoqartillugu, peqqussinnermik imaluunniit inerteqquteqarnermik aalajangiisut, peqqussineq imaluunniit inerteqquteqarnek peqatigalugu aalajangiinnaapput maalaaruteqartoraluarterluunniit aalajangigaaq malinneqassasoq.

Imm. 3. Imm. 2 naapertorlugu aalajangigaaq maalaarutigineqaraluarterluunniit peqqussineq imaluunniit inerteqquteqarnek malinneqassaaq Naammagittaalliuuteqartarfiup allamik aalajangiinissaat tungaanut.

§ 63. Akuersissut, akuerineqarnek imaluunniit immikkut akuersissuteqarnek pillugu maalaarut kinguartitsinnaanngilaq, Naalakkersuisut allamik aalajangiisimatinnagit. Akuerineqarnerit aamma

akuersissutit ilaat maalaaruteqarnissamut piffissaliussap iluani atuutsinnginnissaat aamma maalaarut kinguartitsisinnaasoq pillugit Naalakkersuisut maleruagassanik aalajangersaasinnaapput.

Imm. 2. Akuersissut, akuerineqarneq imaluunniit immikkut akuersissuteqarneq pillugu maalaarutip naammagittaalliuteqartarfimmit allanngortinneqarnissaanut imaluunniit atuukkunnaarsinnissaanut imm. 1-mi aalajangersagaq killiliinngilaq.

§ 64. Inatsisartut inatsisaat manna imaluunniit taassuma malitsigisaanik najoqqutassiarineqarsimasut naapertorlugit akuersissutip, akuerineqarnerup imaluunniit immikkut akuersissuteqarnerup iluaquteqarneq sanaartornissamik ingerlataqarnissamik tunngaveqarpat, suliat taamaattut suliarinerat aallartinneqassanngillat maalaaruteqarnissamut piffissaliussaq § 60, imm. 3-mi taaneqartoq qaangiutsinnagu.

Imm. 2. Immikkut pisoqartillugu aamma qinnuteqarneratigut maalaaruteqarnissamik piffissaq sulii qaangiutinngitsoq sanaartornermi ingerlatat aallartinnissaannut Naalakkersuisut akuersisinnaapput. Taamatut akuersineq maalaarutigineqarsinnaanngilaq. Eqqartuussivimmi suliaassanngortitsineq

§ 65. Inatsisartut inatsisaat manna imaluunniit Inatsisartut inatsisaat tunngavigalugu maleruagassat naapertorlugit aalajangiinerit eqqartuussivimmi suliaassanngortitsinikkut misilinneqarnissaat aalajangiinerup nalunaarutigineqarneraniit qaammatit arfinillit qaangiutsinnagit suliaassiisutigineqassapput. Aalajangiineq tamanut ammasumik nalunaarutigineqarsimappat taamaattoq piffissaliussaq nalunaaruteqarnermiit tamatigut naatsorsorneqassaaq.

Kapitali 15

Pineqaatissiinerit pillugit aalajangersakkat il.il.

§ 66. Akiliisitaasussanngortitaasinnaavoq:

- 1) § 35, imm 3, § 52 imaluunniit § 54, imm. 1 aamma 2 malillugit peqquneqarnerminik malinninngitsoq.
- 2) § 53, imm. 1 aamma 2 naapertorlugu nalunaaruteqanngitsoortoq.
- 3) § 19, imm. 1 aamma imm. 3, § 31, imm. 2, § 32, imm. 1 aamma 2, aamma § 38 imm. 2 naapertorlugu akuersisummik pissarsianiinngitsoortoq.
- 4) § 16, § 17, imm. 1-3, §§ 20-23, § 25, § 27, § 30, imm. 1, § 36, imm. 4, § 40 a, § 42, § 49, imm. 5, § 50 imaluunniit § 54, imm. 3 naapertorlugu peqqussuteqarnermik, inerteqquteqarnermik piumasaqaateqarnermilluunniit unioqqutitsisoq.
- 5) § 15, imm. 1 aamma 2, § 28, imm. 2-mi, § 37, § 38 imm. 1 aamma imm. 3, § 41, imm. 1-mi, § 53, imm. 3 aamma § 64, imm. 1-inik unioqqutitsisoq.

Imm. 2. § 35, imm. 1-imik unioqqutitsisoq akiliisitaasussanngortitaasinnaavoq, eqqakkanik pilersitsinermigut, uninngatitsinermigut, passussinermigut imaluunniit peersinermigut

- 1) Allat peqqissusiannik ulorianartorsiortitsisoq, imaluunniit
- 2) Silaannarmik, imermik, sermimik, qaqqamik imaluunniit nunamik mingutsitsinermik pilersitsisoq.

Imm. 3. § 10, § 18, § 19, imm. 4, § 27, § 34, § 36, imm. 3, § 38, imm. 5, § 40, § 40 aimaluunniit § 42 naapertorlugit akiliisitsinermi akisussaasuusoq pillugu maleruagassanik aalajangersaasoqarsinnaavoq.

§ 67. Inatsisartut inatsisaat imaluunniit Inatsisartut inatsisaat malillugu najoqqutassiat atulersinneqartut akiliisitaasussanngortitsinermik tunngaavissiippata, Kalaallit Nunaanni pinerluttulerinermi inatsimmi maleruagassat malillugit inatsisitigut pisinnaatitaasoq pisussaatitaasorlu akiliisitaasussanngortinneqarsinnaavoq.

Imm. 2. Inatsisartut inatsisaannik matuminnga unioqqutitsinermi pinerluttulerinermi inatsimmi maleruagassat malillugit aamma arsaarinnittoqarsinnassoq.

§ 68. Akiliisitsisutissap annertussusilernerani § 2-mi eqqarsaatigisassat taaneqartut pingaartinneqassapput. Unioqqutitsineq inuussutissarsiummut ingerlatsinermut atasumik pippat kinguneqartitsinermi tamanna sukannernerulersitsissutaassaaq.

Imm. 2. Akiliisitaanerit, Inatsisartut inatsisaat manna imaluunniit Inatsisartut inatsisaat manna naapertorlugu najoqqutassat aalajangersarneqartut malillugit eqqartuussissutigineqartut Nunatta Karsianut tutsinneqassapput.

Kapitali 16

Atortuulersitsineq il.il.

§ 69. Sakkutooqarfimmi Pituffimmi Inatsisartut inatsisaat atuutinngilaq.

§ 70. Inatsisartut inatsisaat una atuutilerpoq januarip aallaqqaataani 2012-mi.

Imm. 2. Peqatigissaanik Avatangisut innarlitsaaliorneqarnissaannik Inatsisartut peqqussutaat nr. 12, 22. december 1988-meersoq, kingusinnerusukkut allannguutai ilanngullugit, atorunnaarpoq.

Imm. 3. Imm. 2-mi inatsisartut peqqussutaat taaneqartut malillugit maleruagassat maannamut atuuttut atuutiinnassapput, Inatsisartut inatsisaat manna naapertorlugu atortuujunnaarsinneqarnissamik imaluunniit allanngortinneqarnissamik tungaannut.

Inatsisartut inatsisaat nr. 1, 29. maj 2012-meersoq (Inatsisip kalaallisut allannerani § 68 imm. 2-p ikkunneqarnera)^[i] piffissat atuutilerfissat pillugit aalajangersakkanik imaattunik imaqarpoq:

§ 2

Inatsisartut inatsisaat taanna ulloq 1. juni 2012-mi atuutilissaaq.

Inatsisartut inatsisaat nr. 10, 27. November 2018-meersoq (KANUKOKA-p atorunnaarsinneqarnerata malitsigisaanik allanngortitsineq)^[ii] piffissat atuutilerfissat pillugit aalajangersakkanik imaattunik imaqarpoq:

§ 2

Inatsisartuni inatsit ulloq 1. Januar 2019 atuutilerpoq.

Imm. 2. Inuit Avatangiisit Innarlitsaaliorneqarnissaat pillugit Naammagittaalliuuteqartarfimmi ilaasortassatut imaluunniit sinniisussatut KANUKOKA-mit toqqagaasut, Inatsisartut inatsisaanni maleruagassat nalinginnaasut malillugit ilaasortaajunnaarnissamik tungaanut atuuffinni taakkunani ingerlaannassapput.

Inatsisartut inatsisaat nr. 16, 1. december 2021-imeersoq (Aatsitassanut inatsisinut tunngasunik erseqqissaaneq, pineqaatissiisarnermut aalajangersakkanik allannguineq, eqqagassanik eqqussuinissamut periarfissat annertusisat, mingutsitsinernut maannamut maleruagassiuiffigineqarsimanngitsunut iliuuseqarnissamut periarfissat, aalajangiinernik allannguinnissamut utertitsinissamulluunniit periarfissanik annertusititsineq il.il.)^[iii] piffissat atuutilerfissat pillugit aalajangersakkanik imaattunik imaqarpoq:

§ 2

Inatsisartut inatsisaat manna atuutilerpoq ulloq 2. december 2021.

Nunalerinermut, Imminut Pilersornermut, Nukissiutitut Avatangiisinullu Naalakkersuisoqarfik, ulloq 15. februar 2022

Mette Skarregaard Pedersen

/

Karen Anne Arleth

[\[i\]](#) Inatsimmi allannguineq, kalaallisoortaata § 68, imm. 2-mi allassimaneranut tunngavoq.

[\[ii\]](#) Inatsimmi allannguineq § 61, imm. 1-mut tunngavoq.

[\[iii\]](#) Inatsimmi allanngineq ukununga § 4, § 33, § 38, imm. 1-5, § 40 a, § 48, imm. 1 aamma 2, § 53, imm. 1, 2. pkt. aamm imm. 2, § 54 a, § 54 b, § 59 a, § 66, imm. 1-3 tunngavoq.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut